

(...)

Vedelle, testament

Au nom de dieu soit scachent tous p(rese)ns et advenir  
que l( )**an mil six cens trente** et le **vingt septie(me)** jour du mois  
de **may** regnant nostre souverain et tres chrestien prince louis  
par la grace de dieu roy de france et de navarre apres  
midy **dans le grand chemin tendant de villemur aux filholz**  
**et au dernier l( )hospital s(ain)t jacques** dud(it) villemur diocese

---

245

bas montauban e(t )seneschaucee de tholose pardevant  
moy no(tai)re et tesmoingz se seroict presentee **salvie vedelle**  
**vefve de jean duc** dud(it) villemur **a l entree d une cabanne**  
**qui est dans la piece joignant led(it) hospital e(t )proche led(it)**  
**chemin** ou moy no(tai)re et tesmoingz no(us) sommes rendus laquelle  
se trouvant **affligee de la maladie contagieuse** mais par  
grace de dieu encore en son bon sans jugement memoire  
et cognoissances, bien voyant oyant e(t )parlant considerant  
qu( )il n( )y a rien de plus certain que la mort ny de plus  
incertain que l( )heure d icelle po(ur) estre d autant mieulx  
disposee lors qu( )il plaira a dieu la rettirer de ce  
monde desirant remunerer les bons services qu( )elle  
a receus reçoit journellement et espere recevoir a  
l( )advenir de **guill(aum)e vedel son fre(re)** et heretier bas nomme  
auroict a haulte vois ( estant veue et tres bien recogneue  
de moy d(it) no(tai)re et tesmoingz ) decalire que de son bon gre  
pure e(t )franche volonte non seduite ny subornee  
de personne elle vouloit faire son testament et der(nier)e  
disp(osition) nuncupatifve de ses biens qu( )elle auroict  
ordonne en la forme suivante en premier lieu  
auroict invoque le nom de dieu le suppliant  
lui vouloir pardonner ses peches et recevoir son  
ame en paradis, voulant qu( )incontinent apres son  
deces son corps soit enseveli selon l ordre de la religion  
catholicque romaine dont elle faict profession au  
**cemetiere s(ain)t jean dud(it) villemur** remettant ses honneurs  
funebres a la discretion dud(it) guill(aum)e vedel son  
fre(re) et heretiet bas nomme, a declaire lad(ite) testatrix  
ne vouloir donner et leguer que tant s(e)ullement cinq  
solz a ch(ac)uns de **ses au(tr)es deux fre(re)s germains** qu( )elle

---

auroict nommes **berenguier e(t )pierre vedelz** et ce po(ur)  
ne luy avoir iceulx tesmoignee d( )affection ny rendu aucung  
service en ses necessites notamment en ceste derniere affliction  
qu( )elle a eue de **la perte de son mari qui est mort de la**

**maladie contagieuse** n( )ont daigne l( )acister ny visiter  
ainsi qu( )ilz estoit fraternellement obliges le(ur) prohibant de  
rien demander ny prethendre sur ses biens et heredite  
en façon quelconque, item a donne et legue lad(ite)  
vedelle testatrix a **marie decolz femme de berenguier  
faure** dud(it) vill(emur) une coette et ung coissin y ayant quelque  
peu de plume dedans de celles qu( )elle a, deux linsseulz  
deux napes deux serviettes toille noienne demi usees trois  
de ses chemises avec deux chemises dud(it) feu duc son mari  
ensemble ung de ses habitz qui sont de peu de valleur  
ung garderrobe qu( )elle a demy use et ung de ses *couvertes*  
le tout voulant que soit deslivre a lad(ite) decolz incontinant  
appres son deces et ce en considara(ti)on des services et acistance  
qu'elle a receus pendant sa maladie et espere recevoir  
tant d( )elle que dud(it) faure que sont dans l infection  
et en tous et ch(ac)uns les biens noms droictz  
voix et actions de lad(ite) salvie vedelle icelle a faict  
et de sa bouche nomme po(ur) son heretier universsel  
et general led(it) guillaume vedel son fre(re) germain  
po(ur) de sesd(its) biens et heredite incontinant apres son  
deces en pouvoir fere cé que bon luy semblera et ce  
po(ur) la bonne amitie qu'elle lui porte et en recognoissance  
des bons services et acistances qu( )il lui a rendus et *continue*  
journallement de tout son pouvoir et tel a declaire  
lad(it) vedelle son testament que veult que vaille par  
la meilleure forme que de droict pourra valoir  
cassant revoquant et annullant to(us) les au(tr)es testamens  
et disp(ositi)ons precedantes affin que le p(rese)nt sorte

.....  
246

a effect sy a pries les tesmoings par elle recogneus  
et nommes par leur nom de sa volonte estre memoratifz  
po(ur) en cas de besoing en rendre tesmoniage et a( )moy d(it) no(tai)re  
m( )a requis lui en rettenir instrument ce qu( )ay faict ez  
p(rese)nces de pierre godin prat(ici)en, pierre peyrat filz d( )au(tr)e  
pierre, barthelemi faure, pierre vaissie dit rode simon  
delau simon coderc de villemur signes et honnorat  
blanqual dud(it) vill(emur) ne scaichans ny lad(it) testatrix et moy  
d(it) no(tai)re ./.

Peyrat, p(resen)t	Faure	Coderc, p(rese)nt
	Godin, p(rese)nt	
Delau, p(rese)nt	Delau, p(rese)nt	
P. Vaysse, p(resen)t	Esteverin	
	not(aire) r(oyal)	